

ԱՂՕԹՔ ՅԱԻԻ ՈՒ ՆԵՂՈՒԹԵԱՆ ՄԷՋ

Երկնաւոր շայր, քու անունդ օրհնեա՛լ ըլլայ: Հոգեղէն ու հոդեղէն բոլոր արարածները անդադար կ'օրհնաբանեն քեզ: Եւ ես, քու խոնարհ եւ թշուառ ծառայ [աղախինդ], ինչքա՛ն կ'ուզեմ ինքզինքս միախառնել անոնց եւ իմ կարկամեալ հոգիիս ու մարմնիս ամէն մէկ բջիջովը նոյն օրհնութիւնը վերառաքել քեզի:

Բայց անձկութեան մէջ է հոգիս. վախ ու տագնապ բռներ են զիս, եւ չեմ հասկանար, ո՛վ Տէր, թէ ինչո՞ւ այսքան ցաւ ու տառապանք, այսքան վիշտ ու նեղութիւն ինծի բաժին դարձուցիր: Արդեօք անո՞ր համար, որ չուզեցի քեզմէ զատ ուրիշ ուրախութիւն ունենալ. արդեօք անո՞ր համար, որ ուխտեցի հարազատ ու հնազանդ որդի մը ըլլալ քեզի. արդեօք անո՞ր համար, որ ուզեցի քու Միածին Որդիիդ հետքերովը ընթանալ:

Ներէ՛ ինծի, ո՛վ գթած շայր, որ կը փորձեմ բայց չեմ հասկնար քու կամքդ ինծի համար: Մեղքով մըթագնած մահկանացուներուս միտքը, քու լոյսէդ եւ անմիջական հաղորդութենէդ կտրուած, չի կրնար հասկնալ ինչ որ դուն կը կամենաս եւ ինծի համար պատրաստեր ես: Բայց հոգիիս ամբողջ զօրութեամբ յօժար եմ ես քու կամքիդ. յօժարութիւնս ընդունէ՛, Տէ՛ր, անուշաբոյր զոհի պէս: Կեանքս քո՛ւ կը ե, քեզի՛ կու տամ. չունի՛մ քեզի արժանի ընծայելիք ոեւէ բան, եթէ ոչ միայն՝ սէրս. սիրոյդ դիմաց. ընդունէ՛ զայն քու ընծայած փրկութեանդ բուրվառին մէջ՝ սիրոյ հո՛ւր Միածին Որդիիդ միացած՝ անուշահոտ խունկի պէս:

Տո՛ւր որ հասկնամ անքննելի քու կամքդ, Հա՛յր իմ սիրելի: Կը փորձե՞ս զիս իբրեւ որդի, որպէսզի իմ մէջս առաքինութիւններու ադամանդը յայտնես. եթէ ա՛յդ է. այնպէս ըրէ՛ որ փորձութեան կակիծին մէջ եւ չարին այլասերող ոյժին դիմաց՝ դառնութեամբ ու չարով չպղտորի իմ հոգիս, այլ զօրացո՛ւր զիս եւ թոյլ տուր՝ որ իմ տկար միտքիս համար անհասկնալի եւ գերիվեր արդարութեանդ պատմողը ըլլամ ու ճշմարտութեանդ եւ իրաւունքիդ հաւատարիմ մարտիկը մընամ: Անդրադարձի առի՞թ կու տաս. որպէսզի յիշեմ հաւատքի իմ կոչումս. շնորհէ ու ճանչնամ քու շնորհքդ, եւ նեղութիւններուս տագնապին մէջ իսկ քու անունդ օրհնեմ ու փառաբանեմ, քու օրհնութիւնդ ժառանգելու համար: Կը քննե՞ս զիս՝ քու մաքրական ու սրբաբար կրակիդ աղտեղախանձ բովին մէջ, եւ սրբութեան առի՞թ կու տաս, որպէսզի մարմնական չարչարանքներու եւ նեղութեանց փորձառութեամբը դադրիմ այլեւս մեղանչելէ. պարգեւէ որ ա՛լ մոռնամ աշխարհային ցանկութիւնները, կեանքիս բոլոր օրերուն քու կամքիդ համաձայն ապրիմ եւ քու բազմատեսակ պարգեւներուդ տնտեսը դառնամ ուրիշներուն համար: Քու Որդիիդ փրկագործական չարչարանքներուն մասնակի՞ց կը դարձնես անարժանս. ի՛նչ գերազանց շնորհք է այս. տո՛ւր, Աստուա՛ծ իմ, տո՛ւր որքան որ կամենաս, թող քու օրհնեալ կա՛մքդ ըլլայ: Բայց անոնց հետ միասին՝ միւխթարիչ Սուրբ Հոգիիդ պարգեւներով թո՛յլ տուր որ ուրախութեամբ կարենամ ընդունիլ եւ կրել զանոնք, մեզի համար քու պատրաստած անպատմելի փառքիդ ճաշակը առնեմ անոնց մէջէն, եւ անոնց մէջ տեսնեմ երկրի վրայ քո՛ւ փառաւորումդ, Որդիին եւ Սուրբ Հոգիին հետ միասին. այժմ եւ միշտ եւ յաւիտեանս յաւիտենից: Ամէն: